

LÖGREGLUSAMÞYKKT

fyrir Kópavogskaupstað.

1. gr.

Almannafæri tákna í samþykkt þessari götur, gangstéttir, og svæði, sem almenningi eru ætluð til afnota, svo sem leikvelli, bryggjur, torg og íþróttasvæði. Reglur um almannafæri gilda einnig um þá staði, sem eru almenningi opnir, svo sem verslanir, veitingastaði, almenningssöfn, afgreiðslustaði bifreiða o. fl.

2. gr.

Sérhver borgari sem er á almannafæri, er skyldur að skýra frá nafni sínu og heimilisfangi, ef lögreglan óskar þess.

3. gr.

Pegar fólk safnast saman á almannafæri, svo sem í eða við útsölur, biðstöðvar strætisvagna, skemmtistaði eða aðra þjónustustaði, skal það mynda röð, þannig að þeir fái fyrst afgreiðslu sem fyrst koma.

4. gr.

Öllum er skylt að fara eftir þeim fyrirmælum, sem lögreglan veitir í því skyni að koma á reglu á almannafæri og greiða fyrir því að umferð sé með eðlilegum hætti. Beri nauðsyn til, getur lögreglan kvatt sérhvern fulltíða mann sem nærstæður er, til þess að afstýra óreglu eða óspektum á almannafæri.

Skylt er að tilkynna lögreglustjóra fyrirhugaðar hópgöngur og útifundi. Skal gönguleið og fundarstað lýst. Lögreglustjóri getur breytt gönguleið og/eða fundarstað, telji hann það nauðsynlegt vegna umferðar.

5. gr.

Háttsemi, sem raskar allsherjarreglu, má ekki eiga sér stað á almannafæri. Bannað er að berja á dyr, hringja dyrabjöllum eða síma að ófyrirsynju. Einnig er bannað að raska næturro fólks að tilefnislausu.

6. gr.

Ekki mega menn þyrpast saman á almannafæri ef það truflar umferð eða veldur vegfarendum töfum eða óþægindum.

Lögreglan getur bannað notkun magnara, hljómflutningstækja eða sambærilegs búnaðar, ef sýnt þykir að slíkt valdi ónæði.

7. gr.

Þvott á útitröppum, gangstéttum eða gluggum má einungis framkvæma í frostlausu veðri, ef þvotturinn veldur rennsli í gangstéttir eða götur. Þvotti skal þannig hagað að eigi sé hætt á að vatn skvettist á vegfarendur.

Eiganda eða umráðamanni húss er skylt að fjarlægja af því snjó og ís, sem hætt er á að fallið geti á vegfarendur og valdið þeim tjóni.

Bæjarstjórn ákveður götunöfn og lætur festa upp vegvísa og götunöfn þar sem þurfa þykir. Húseigendur og umráðamenn húsa skulu festa töluspjöld er tákna húsaröð.

8. gr.

Skylt er að ganga vel um á almannafæri og skaða hvorki né skemma hluti, sem ætlaðir eru til almenningsafnota eða til fegrunar. Gildir það einnig um mannvirki, sem liggja að almannafæri. Þannig er óheimilt að mála á vegg og önnur mannvirki eða festa auglýsingar, nema að fengnu leyfi eiganda eða umráðanda. Sá sem hefur fest upp auglýsingu, skal taka hana niður og hreinsa öll vegsummerki, þegar auglýsing hefur þjónað tilgangi sínum og er orðin ótímabær. Löglega uppfestar auglýsingar má ekki fjarlægja eða skemma.

Trjágróður sem skyggir á umferð t. d. við gatnamót skal snyrta svo að útsýn fyrir vegfarendur skerðist ekki. Bannað er að rífa upp gróður, sem komið hefur verið fyrir á almannafæri og skulu vegfarendur gæta þess að troða ekki niður grasflatir, blómabeð eða trjálundi, sem ræktað er til fegrunar og menningarauka í bænum.

9. gr.

Bannað er að fleygja eða skilja eftir rusl eða annað það, sem valdið getur óheilmæmi eða óþryði á auðar lóðir, í fjörum eða annars staðar á almannafæri.

10. gr.

Á almannafæri má enga atvinnu stunda, sem tálmar umferð. Utan sölubúða er sala á hvers konar varningi bönnuð með þeim undanþágum, sem hér greinir: blöð, bæklinga, dagskrár, aðgöngumiða, happdrættismiða og merki. Bæjarstjórn getur veitt leyfi til vörusölu á torgum og öðrum stöðum í bænum, enda séu ákvæði um verslunarleyfi og önnur sambærileg ákvæði því ekki til fyrirstöðu, að dómi lögreglustjóra. Slík leyfi bæjarstjórnar skulu bundin við ákveðnar tegundir varnings enda er heimilt að setja skilyrði fyrir leyfi, sem talin eru nauðsynleg.

11. gr.

Afgreiðslustað bifreiða (bifreiðastöð) eða bílasölu má einungis hafa í því húsnæði og á þeim stað í bænum, sem bæjarstjórn hefur samþykkt. Áður en leyfi er veitt skal leita umsagnar lögreglustjóra. Bæjarstjórn veitir leyfi um tiltekinn tíma í senn og getur takmarkað leyfið við ákveðinn fjölda bifreiða og sett önnur þau skilyrði, sem þurfa þykir.

12. gr.

Á götum bæjarins má ekki gera rennibrautir né renna sér á sleðum eða skíðum eða iðka aðra slíka leiki eða íþróttir, ef lögreglan telur slíkt valda hættu eða truflun umferðar. Lögreglustjóri getur þó veitt leyfi til skíðaleikja, sleðaferða eða annarra leikja og íþróttá alfaraleiðum. Skal þá merkja slíkar leiðir og loka þeim fyrir umferð ökutækja.

13. gr.

Á almannafæri má ekki nota skotvopn, halda flugeldasýningar, bera logandi blys eða tendra bálkóst, nema með leyfi lögreglustjóra. Sprengingar vegna mannvirkjagerðar má

aðeins gera með samþykki lögreglustjóra. Sprengiefni má aðeins geyma þar sem lögreglustjóri og slökkviliðsstjóri samþykkja.

14. gr.

Án leyfis húsráðanda má enginn láta fyrirberast á lóðum eða í húsi hans eða geymsluhúsi og ekki fara þangað í söluerindum.

15. gr.

Bannað er að fleygja rusli eða úrgangi á lóð annars manns eða á almannafæri. Hver sá sem það gerir skal skyldur að hreinsa upp ruslið og flytja það á brott tafarlaust, á sinn kostnað.

16. gr.

Á almannafæri má ekki setja neitt það, sem hindrað getur umferð. Óheimilt er að leggja bifreiðum og öðrum ökutækjum á gangstéttar. Bæjarstjórn getur þó veitt undanþágu frá banninu. Merkja skal sérstaklega þau bifreiðastæði, sem undanþágan nær til. Slík stæði mega þó ekki taka meira rými af gangstétt en svo að eftir verði að minnsta kosti hálf annars metra skák fyrir gangandi fólk að komast leiðar sinnar. Vöruflutningabílar, sem eru meira en 3 tonn að leyfðri heildarþyngd svo og fólksflutningabifreiðar, sem gerðar eru til þess að flytja 10 farþega eða fleiri, mega ekki standa á götum eða almennum bifreiðastæðum bæjarins á tímanum milli kl. 22.00 og 06.00. Bann þetta nær einnig til allra gerða vinnuvéla og dráttarvéla án tillits til þunga þeirra. Bæjarstjórn getur veitt undanþágu frá banni þessu og skal þá afmarka og merkja sérstaklega þá staði þar sem undanþágan hefur verið veitt. Heimilt er að flytja á brott og taka í vörslu bæjarins bifreiðar sem standa án skráningarnúmera á götum og almennum bifreiðastæðum. Tilkynna skal skráðum eiganda og/eða umráðamanni um flutninginn. Hann ber kostnað vegna flutnings og vörslu bifreiðarinnar.

17. gr.

Lögreglustjóri getur bannað stöður hjólhýsa, tengivagna, gáma, báta og slíkra flutningatækja á götum bæjarins og almennum bifreiðastæðum svo og húsalóðum ef hann telur að slík tæki valdi íbúum ónæði eða séu umferðinni til trafala eða hættu. Bæjarstjórn getur einnig átt frumkvæði að slíkum aðgerðum í samráði við lögreglustjóra.

18. gr.

Lögreglustjóri getur bannað umferð um ís á vatni eða sjó, ef hann þykir ekki traustur.

19. gr.

Bannað er að stöðva eða leggja ökutæki nær gatnamóum en 5 metra miðað við brún þvervegjar.

20. gr.

Bæjarstjórn getur bannað að mjög hávaðasömum flutninga- og farartækjum sé ekið um götur í íbúðahverfum. Er unnt að banna slíka umferð allan sólarhringinn eða eftir atvikum að kvöld- og næturlagi.

Bannað er að stöðva eða leggja ökutæki í botngötu þannig að það hindri eðlilegan akstur við að snúa bifreiðum.

21. gr.

Þeir sem flytja varning eða farm um götur bæjarins skulu gæta þess að vandlega sé búið um farminn þannig að hann valdi ekki óþrifnaði eða tjóni. Hrynji möl, mold, áburður eða

annar flutningur á almannafæri við flutninginn, fermingu eða losun er stjórnanda flutnings-tækis skylt að hreinsa það strax upp.

22. gr.

Hross mega ekki ganga laus á almannafæri. Lausa hesta má ekki reka um götur bæjarins.

23. gr.

Ekki má gera skurð í gangstéttir, götur eða torg bæjarins né heldur raska þeim á annan hátt nema að fengnu leyfi bæjarverkfræðings og samþykki lögreglustjóra. Að verki loknu skal færa það á ný í lag sem raskað var. Skal haga verkum þannig að sem minnstur farartálmi verði að.

Bæjarverkfræðingur gerir þær ráðstafanir, er honum þykja þurfa, svo sem að setja upp viðvaranir eða merkingar, til þess að afstýra hættu fyrir vegfarendur. Lögreglustjóri getur bannað alfarið eða að hluta umferð um götur meðan á verki stendur.

Ennfremur getur hann ákveðið að skurðir eða gryfjur í götur séu byrgðar þannig að umferð sé óhindruð um göturnar á þeim tíma sem ekki er starfað, svo sem að næturlagi og um helgar. Ef lögreglustjóri telur verkið dragast óhæfilega, getur hann látið færa í samt lag það sem raskað var, á kostnað þess sem framkvæma átti verkið.

24. gr.

Við byggingu húsa eða annarra mannvirkja, niðurrif, viðgerðir eða brottflutning þeirra, skal hafa samráð við lögreglustjóra og er öllum viðkomandi skylt að fara eftir þeim fyrirmælum, sem lögreglan setur í því skyni að forðast umferðartafir, hættu og óþægindi fyrir hinn almenna vegfaranda.

Girðingar, sem reistar hafa verið til þess að afstýra hættu, eða farartálma, skal fjarlægja strax að framkvæmd lokinni, eða þegar lögreglan krefst þess.

Ef hús brennur eða það er flutt á brott, er eiganda skylt að ganga þannig frá lóðinni eða grunninum og nágrenni, að ekki stafi af því hætta vegna áfoks braks eða að vatn safnist í grunna. Ennfremur skal gæta þess að óþrifnaður og óprýði stafi ekki af slíkum stöðum.

Ekki má geyma möl eða annað byggingarefni nær brunahana en að 15 metrar hið minnsta sé í milli.

25. gr.

Lausir stigar, sem notaðir eru við viðgerðir á húsum, málun þeirra, eða við gluggaþvott, skulu vera traustir. Við götu í þéttbýli skal vörður standa við stigann á meðan verk fer fram. Strax og verki lýkur skal fjarlægja stiga. Gera skal ráðstafanir til þess að stigar sjáist vel, t. d. með endurskinsmerkjum eða/og áberandi lit.

26. gr.

Enginn má reka leiktæki, spilakassa, knattborð eða slík skemmtitæki gegn greiðslu nema að fengnu samþykki bæjarráðs. Slík leyfi skulu ekki veitt til lengri tíma í senn en þriggja ára. Leyfi verða einungis bundin við nafn leyfishafa og rekstur á ákveðnum, tilteknum stað.

Brjóti leyfishafi gegn ákvæðum þessarar samþykktar eða að reksturinn er ámælisverður að dómi bæjarstjórnar, getur hún svipt hann leyfinu enda hafi leyfishafi áður verið áminntur um úrbætur.

Knattborð, spilakassa eða leiktæki má reka frá kl. 09.00 til kl. 23.30.

Börnum yngri en 14 ára er óheimill aðgangur að slíkum tækjum nema í fylgd forráðamanna.

27. gr.

Heimilt er að hafa veitingastaði í bænum opna frá kl. 06.00 til kl. 03.00, eftir nánari ákvörðun lögreglustjóra. Skulu gestir hafa farið út eigi síðar en hálfri stundu eftir að lokað er.

Á gistihúsum má þó selja ferðamönnum veitingar á hvaða tíma sólarhrings sem er.

Lögreglustjóra er heimilt að leyfa annan afgreiðslutíma en um ræðir í 1. mgr. á veitingastað sem aðallega er ætlaður fyrir ferðamenn.

28. gr.

Peir sem reka veitingastað, gistihús, kvikmyndahús, leikhús eða annað samkomuhús eða halda almenna skemmtun, skulu sjá um að allt fari vel fram.

Þeim sem reka veitingahús þar sem dansað er skal alltaf skylt að hafa dyraverði. Á öðrum samkomustöðum ákveður lögreglustjóri hvort slík gæsla teljist nauðsynleg.

Allt samkomuhald, sem um ræðir hér að framan skal háð sérstöku eftirliti. Lögreglunni er heimilt að fara um samkomusali og önnur húsakynni, sem gestir eiga aðgang að.

Á gististöðum skal haldin gestaskrá.

29. gr.

Þeim sem hafa á hendi veitingasölu er skylt að gera allt það sem í þeirra valdi stendur til þess að halda góðri reglu og velsæmi í heiðri. Þeir skulu gæta þess að fjöldi gesta hverju sinni takmarkist við leyfilegan hámarksfjölda samkvæmt veitingaleyfi eða rekstrarleyfi. Þá skal forráðamönnum skylt að gæta þess að loftræsting sé í lagi svo og að fulls hreinlætis sé gætt og annarra hollustuhátta.

30. gr.

Láti einhver ógert það sem honum er skylt að gera samkvæmt samþykkt þessari, getur lögreglustjóri látið framkvæma það eða gert nauðsynlegar ráðstafanir til þess að hindra að vanræksla valdi tjóni eða slysum.

Kostnaður við þetta og kostnaður, sem leiðir af þeim ráðstöfunum, er lögreglustjórinn gerir til þess að hindra brot gegn því, sem bannað er í samþykktunum, greiðist af brotamanninum eða, ef hann er eigi fær um það, úr ríkissjóði.

31. gr.

Brot gegn lögreglusamþykkt þessari varða sektum. Með mál sem rísa út af brotum á samþykktinni skal fara að hætti opinberra mála.

Lögreglusamþykkt þessi, sem bæjarstjórn Kópavogs hefur samið og samþykkt samkvæmt lögum nr. 13. janúar 1890, um lögreglusamþykktir fyrir kaupstaðina, staðfestist hér með til að öðlast gildi þegar í stað og birtist til eftirbreytni öllum þeim, sem hlut eiga að máli.

Jafnframt er úr gildi numin lögreglusamþykkt fyrir Kópavogskaupstað, nr. 85 30. maí 1962, með síðari breytingum.

Dóms- og kirkjumálaráðuneytið, 28. júlí 1986.

Jón Helgason.

Ólafur W. Stefánsson.